



REPÚBLICA DEMOCRÁTICA DE TIMOR-LESTE
V GOVERNO CONSTITUCIONAL
GABINETE SECRETARIA ESTADO DA PROMOÇÃO DA IGUALDADE

DISKURSU S.E. SEKRETARIA ESTADU BA PROMOSAUN IGUALDADE (SEPI)
Abertura ba Serimonia Lansamentu Espozisaun PhotoVoice:
Lian husi Rai
25 Janeiro de 2013
4:30pm, Sentru Konvensaan Dili

Hau nia respeitu ba:

S.E. Finn Reske-Nielsen, Xefe Ekipa Liquidasaun UNMIT no Koordinator Rezidente ONU.

Obrigada ba oportunidade hodi loka **Espozisaun PhotoVoice**, kona-ba Programa Konjuntu rua mak implementa ona ho tulun husi Fundu Realizasaun Objektivu Dezenvolvimentu Milénium – ida maka “Apoiun ba Igualdade Jéneru no Direitu Feto nian iha Timor-Leste” (Dezemburu 2008 – Agostu 2012) ne’ebé SEPI hanesan Co-Chair ba Komite Jestaun Programa. Iha Programa Konjuntu segundu bolu naran: “Promosaun ba Sustentabilidade Alimentár no Seguransa Nutrisaun nian iha Timor-Leste” (Novemburu 2009 – Marsu 2013).

Hanesan hau iha esperensia kona-ba Programa Konjuntu Igualdade Jéneru deit, hau hakarak fo deit reflesaun ruma kona-ba ami nia servisu no relata kona-ba atividades Orsamentu Sensível ba Jéneru no Violénsia bazeia ba Jéneru.

Iha persepsaun pozitivus no negativus husi ema ida-idak kona-ba asuntos Jéneru no Violénsia Bazeia ba Jéneru hanesan tuir mai ne’e. Iha autoridade lokal ida, hau la bele temi naran, nia fo nia persepsaun negativu imediatu kona-ba Violénsia Doméstika. Nia hateten katak, “nia iha direitu atu la hatoo keixa kazu Violénsia Doméstika ba entidades kompetentes, mesmu ke, (even though) Lei Kontra Violénsia Doméstika haruka.” Iha mos Diretor Eskola Sekundaria ida, fo nia opiniaun katak “Violénsia Doméstika laos asuntu importante atu Governu ka sé deit (anyone else) atu interven. Ne’e asuntu internal, hanesan *bikan kanuru baku malu*.” Maibe, depois de

hetan formasaun sira nia ideas negativu ne'ebé mosu (appear) iha inisiu muda hotu no sira aseita ho konseitu Lei Kontra Violénsia Doméstika ne'ebé iha no sira promete atu aplika iha sira nia servisu fatin, familia no comunidade.

Iha mós mudansas signifkativus iha mentalidade Prizoneiru sira wainhira hetan tiha treinamentu kona-ba Kontrola Hahalok Violentu. Sira dehan katak, sei karik treinamentu ne'e hala'o antes karik ami la tama iha fatin ida ne'e, tamba ne'e, ami rekomenda ba ita bo'ot sira, atu halo treinamentu ne'e ba comunidade em jeral hanesan medidas preventivas. Hanesan rezultadu ba rekomendasaun ne'e, ami hala'o ona treinamentu hanesan pilotu ba joven sira, inklui grupu arte marsiais, iha Distritu Baucau no Ainaro.

Iha mós, ezemplu rua seluk hau hakarak hato'o iha ne'e, maka antes halo Vizita Estudu ba India kona-ba Orsamentu Sensível ba Jéneru, Sekretaria Distritu rua la dun fo interese ba Abordajen Integradu ba Jéneru, mesmu ke sira sai hanesan Prezidente ba Grupu Trabalho Jéneru iha nia distritu. Maibe, depois de halo Vizita Estudu ne'e, sira nia atetude muda hanesan iha boa vontade atu koalia kona-ba Igualdade Jéneru. Ida iha ona enerjia foun atu bele halo Planu Asaun Jéneru, no ida seluk komesa partisipa masimu iha atividades sira relasiona ba jéneru.

Iha nível nasional mós, iha mudansa signifkativu wainhira tuir tiha formasaun kona-ba Orsamentu Sensível ba Jéneru no Abordajen Integradu ba Jéneru. Iha Diretor Jéral ida ne'ebé nia atetude bias no diskriminatoriu ba feto, maibe, depois de hetan formasaun tiha, nia hahalok (attitude) muda no nia sai ema ida ne'ebé sensível-liu ba jéneru no ikus mai sai ema ida ne'ebé fo suporta makaas ba Abordajen Integradu ba Jéneru. De faktu, depois de hirak ne'e hotu, Planu Asaun Anual husi Ministeriu no Sekretaria Estadu sira komesa iha sensibilidade jéneru makaas.

Tuir ami nia esperensia rasik, servisu Programa Konjuntu ida ne'e, fo benefisiu makaas no bele muda ideias, mentalidades, no atetudes negativu sai pozitivu. Hau dezeja bom susesu ba espozisaun ida ne'e. Obrigada.